



## **BASES REGULADORAS DA CONVOCATORIA DO CONCURSO DE CARROZAS E COMPARSAS DE ENTROIDO DO CONCELLO DE SAN CRISTOVO DE CEA 2025**

### **OBXECTO**

O obxecto das presentes bases é regular o réxime de concesión de premios para o Concurso de carrozas e comparsas de Entroido do Concello Do Concello de San Cristovo de Cea, que terá lugar nun desfile que se celebrará o sábado 1 de marzo de 2025 en San Cristovo de Cea.

A hora e lugar exacto de comezo do desfile será comunicado oportunamente ás persoas participantes, así coma a súa orde de participación.

### **PERSOAS PARTICIPANTES**

Poderá participar calquera persoa física, entidade con personalidade xurídica ou grupo de persoas sen personalidade xurídica. No suposto de grupo de persoas sen personalidade xurídica, será necesario un acordo de constitución da agrupación, xunto co DNI de todas as persoas integrantes. Neste acordo nomearase a unha/s persoa/s representante/s e detallaranse as persoas que o integran, das que se entenderá que asumen os compromisos de execución e que imputan o importe do premio a partes iguais, de xeito que todas elas adquiren a consideración de beneficiaria.

No caso de que participen persoas menores de idade, será necesario achegar unha autorización asinada polos seus pais/nais ou titores/as.

### **REQUISITOS**

Tanto as carrozas coma as comparsas teñen que estar integradas por un mínimo de 8 persoas. As comparsas poden ir acompañadas de vehículo ou elemento artístico, que será valorado no concurso. Enténdese como carroza calquera estrutura remolcada por vehículo motorizado ou construída sobre el, cunha decoración especial e cunha elaboración debidamente coidada, cun mínimo de 4 rodas e con capacidade mínima para 6 persoas, e sempre que a organización a cualifique coma tal.

As dimensións máximas das carrozas, no seu conxunto total, serán as seguintes:



- Carrozas ríxidas: alto 4 m, longo 7 m, e ancho 2,50 m
- Carrozas articuladas: alto 4 m, longo 9 m e ancho 2,50 m

Todas as persoas participantes comprométense a responsabilizarse dos actos ou accións que se produzan e eximen ao Concello de San Cristovo de Cea de calquera responsabilidade. Queda prohibido o uso de animais vivos, de esprais, de petardos ou de outros elementos pirotécnicos, o lanzamento de obxectos perigosos ao público e inxerir bebidas alcohólicas durante todo o desfile.

## CRITERIOS DE VALORACIÓN

Os criterios a valorar son os seguintes: o espírito do Entroido (a gracia, a empatía co público, a sátira, a transgresión, a retranca....), a animación musical, a creatividade e a orixinalidade, a elaboración do vestuario e o resto dos aderezos, e o número de persoas participantes.

## FORMA E PRAZO DE INSCRICIÓN

O prazo de solicitude de participación remata o mércores 26 de febreiro de 2025, ás 14:00 horas.

As solicitudes presentaranse no Rexistro Xeral do Concello de San Cristovo de Cea (Praza Maior, 1 32130 Cea (Ourense) en horario de 9:00 horas a 14:30 horas, de luns a venres, ou no rexistro electrónico da Sede Electrónica do Concello de San Cristovo de Cea ( <https://concellosancristovodecea.sedelectronica.gal>) . As solicitudes presentaranse no modelo normalizado que se incorpora como Anexo I destas bases e que estará dispoñible na sede electrónica municipal ( <https://concellosancristovodecea.sedelectronica.gal/> ).

Xunto coa solicitude deberá achegarse a seguinte documentación:

- DNI da persoa solicitante.
- CIF da entidade xurídica solicitante, xunto co DNI da persoa representante.
- No caso de grupos de persoas sen personalidade xurídica, acordo de constitución da agrupación (segundo o modelo normalizado que se incorpora como Anexo II destas bases e que estará dispoñible na sede electrónica municipal), xunto co DNI de todas as persoas integrantes.
- Certificado bancario do número de conta da persoa ou entidade xurídica solicitante. No caso de grupos de persoas sen personalidade xurídica, certificado bancario do número de conta da/s persoa/s representante/s a quen se lle ingresará o importe do premio.



- Declaración responsable na que se faga constar que non está incurso en prohibición para ser beneficiaria de subvencións (incluída na solicitude).
- Declaración responsable de que está ao corrente no pagamento das obrigas tributarias coa AEAT e coa ATRIGA e de Seguridade Social (incluída na solicitude).
- Compromiso responsable de respectar as normas deste concurso, así como de que as persoas participantes en conxunto se farán cargo de calquera dano ou lesión que poidan provocar durante a celebración do concurso a calquera outra persoa participante ou do público (incluída na solicitude).

A participación neste concurso implica a total aceptación destas bases. O Concello da San Cristovo de Cea resérvase o dereito para a captación e difusión das imaxes do concurso para fins de publicidade e promoción en prensa e na páxina web municipal. A utilización das fotos e vídeos estará suxeita exclusivamente a un uso informativo nunca comercial. Coa realización da inscrición as persoas participantes admiten que o organizador poida facer uso da imaxe de todas as persoas participantes en calquera formato, xa sexa gráfico ou dixital, e en todas as súas formas.

Todos os dereitos de imaxe pertencen ao organizador (Concello da San Cristovo de Cea).

## PROCEDEMENTO DE SELECCIÓN

Un xurado seleccionará as carrozas ou comparsas premiadas.

O xurado estará integrado por un representante de cada carroza/comparsa participante. Cada unha das persoas integrantes do xurado puntuará de 1 a 10 puntos a cada unha das carrozas e comparsas participantes, a excepción da que representa, nun documento que se lle facilitará no momento do desfile e que irá debidamente asinado.

Cada carroza e comparsa obterá a puntuación resultante da suma de todos os puntos obtidos das persoas que integran o xurado. As carrozas ou comparsas que reciban a maior puntuación percibirán, sucesivamente, o 1º, 2º e 3º premio. En caso de empate, resolverase en favor da carroza ou comparsa que obtivese o maior número de 10 puntos; se persistise o empate, en favor da que obtivese un maior número de 9 puntos, e así sucesivamente. A valoración do xurado, que será inapelable, coa puntuación obtida por cada carroza ou comparsa participante, será recollido nunha acta que asinará algunha das persoas integrantes da organización, á que se lle xuntará o documento coa puntuación outorgada por cada persoa integrante do xurado. O resultado do concurso farase público o mesmo día



do desfile no Pavillón de Deportes de Cea, podendo entregarse os premios de xeito meramente simbólico.

Sobre a base da acta que recolla a valoración do xurado, a Alcaldía mediante unha resolución outorgaralles os premios ás persoas gañadoras do concurso con identificación da denominación, CIF/DNI e importe do premio. O acordo de outorgamento dos premios será obxecto de publicación na sede electrónica municipal (<http://concellodecea.sedelectronica.es>) e na Base de Datos Nacional de Subvencións (<http://www.infosubvenciones.es>), con expresión das persoas beneficiarias e da contía dos premios concedidos.

## PREMIOS

O importe dos premios será o seguinte:

- 1º premio: 700,00 €
- 2º premio: 350,00 €
- 3º premio: 150,00 €

A maiores, existe una bolsa de axuda para todas as carrozas/comparsas participantes de 300 € que se repartirá de forma proporcional entre todas.

## CUMPRIMENTO R.G.P.D.

En cumprimento da R.G.P.D., os datos recollidos a través do formulario de inscrición no concurso pasaran a formar parte dun arquivo do cal é titular o Concello de San Cristovo de Cea. A finalidade de este arquivo será para a xestión e prestación de servizos solicitados por parte do participante, así como medio de comunicación para necesidades do concurso e de futuras informacións de mais eventos do concello. O titular dos datos subministrados poderá exercer os seus dereitos de acceso, rectificación, cancelación e oposición dos datos a través de correo postal ó seguinte enderezo: Praza Maior 1, 32130 San Cristovo de Cea, Ourense. Calquera incumprimento destas bases suporá a exclusión da persoa participante do concurso.

